



Broj: **01/3-50-1-3-36/09**

Sarajevo, 7. 10. 2009. godine

Z A P I S N I K

36. sjednice Komisije za vanjsku trgovinu i carine Predstavničkog doma Parlamentarne skupštine BiH, održane 7. 10. 2009. godine

Sjednica je počela u 11 sati.

Sjednici je predsjedavao predsjedavajući Komisije Slavko Jovičić.

Sjednici su prisustvovali članovi Komisije: Šemsudin Mehmedović, Mehmed Suljkanović, Salko Sokolović, Jerko Ivanković Lijanović, Jozo Križanović i Željko Kuzmanović.

Opravdano je odsustvovao Ekrem Ajanović.

Sjednici su prisustvovali: Renata Bjelica, stručni savjetnik u MVTEOBiH, Ljubiša Ćosić, savjetnik ministra vanjske trgovine i ekonomskih odnosa BiH, Dušan Nešković, pomoćnik ministra vanjske trgovine i ekonomskih odnosa BiH, Melisa Ljuša, šef Odsjeka u MVTEOBiH, Amir Lubovac, stručni savjetnik u MVTEO BiH, Medina Delalić, viši stručni saradnik u Sektoru za odnose s javnošću, Sonja Abdulovski, stručni saradnik u Komisiji za vanjsku trgovinu i carine, i Emira Češljarić, sekretar Komisije za vanjsku trgovinu i carine.

Za sjednicu Komisije predložen je i jednoglasno usvojen sljedeći

D N E V N I R E D

1. Usvajanje Zapisnika 35. sjednice Komisije;
2. Razmatranje Prijedloga zakona o općoj sigurnosti proizvoda, predlagač: Vijeće ministara BiH na osnovu člana 104. Poslovnika Predstavničkog doma, radi dostavljanja Mišljenja predsjedavajućem Predstavničkom domu;
3. Razmatranje Prijedloga zakona o izmjenama i dopunama Zakona o nadzoru nad tržištem u BiH, predlagač: Vijeće ministara BiH na osnovu člana 104. Poslovnika Predstavničkog doma, radi dostavljanja Mišljenja predsjedavajućem Predstavničkom domu;
4. Analiza politika u oblasti poljoprivrede, ishrane i ruralnog razvoja BiH, s prijedlogom mjera (realiziranje zaključka 32. sjednice Komisije).

Ad.1. Usvajanje Zapisnika 35. sjednice Komisije

Zapisnik 35. sjednice Komisije usvojen je jednoglasno, bez primjedbi.

Ad.2. Razmatranje Prijedloga zakona o općoj sigurnosti proizvoda, predlagač: Vijeće ministara BiH na osnovu člana 104. Poslovnika Predstavničkog doma, radi dostavljanja Mišljenja predsjedavajućem Predstavničkog domu

Uvodne napomene dao je predsjedavajući Komisije Slavko Jovičić. Kazao je da je Vijeće ministara BiH, na 93.sjednici, održanoj 2.7.2009., utvrdilo Prijedlog zakona o općoj sigurnosti proizvoda, te zaključilo da se on dostavi Parlamentarnoj skupštini BiH na razmatranje po osnovnom zakonodavnom postupku. Kolegij Doma je, u skladu s članom 101. stav (2) Poslovnika, odredio Komisiju za vanjsku trgovinu i carine kao nadležnu za razmatranje Prijedloga zakona. Zatim je dao riječ predstavnicima predlagača.

Ljubiša Ćosić, savjetnik ministra vanjske trgovine i ekonomskih odnosa BiH, rekao je da je Ministarstvo prošle godine primilo Inicijativu za donošenje ovog zakona. Formirana je radna grupa u kojoj su bili predstavnici: MVTEOBiH, Agencije za nadzor nad tržištem BiH te entiteta i Brčko Distrikta BiH. Preuzete su direktive Evropske komisije. Renata Bjelica, stručni savjetnik u MVTEOBiH, naglasila je da je osnovni razlog za donošenje ovog zakona opća sigurnost proizvoda koji su stavljeni na tržište. Zatim, adekvatno i jedinstveno uređenje na tržištu BiH, nesmetana trgovina u BiH, te zaštita potrošača kao korisnika. Cilj je osigurati visok nivo zaštite građana.

Nakon rasprave o predloženom tekstu Zakona i dobivanja odgovora od predlagača na postavljena pitanja, Komisija je jednoglasno podržala principe predloženog zakona.

U skladu s članom 104. Poslovnika Predstavničkog doma, Komisija će dostaviti Mišljenje predsjedavajućem Predstavničkog domu.

Ad.3. Razmatranje Prijedloga zakona o izmjenama i dopunama Zakona o nadzoru nad tržištem u BiH, predlagač: Vijeće ministara BiH na osnovu člana 104. Poslovnika Predstavničkog doma, radi dostavljanja Mišljenja predsjedavajućem Predstavničkog domu

Predsjedavajući Komisije je u uvodnim napomenama istakao da je Vijeće ministara BiH na 93. sjednici, održanoj 2.7. 2009., utvrdilo Prijedlog zakona o izmjenama i dopunama Zakona o nadzoru nad tržištem u BiH i uputilo ga Parlamentarnoj skupštini BiH, uz prijedlog da se razmatra po osnovnom zakonodavnom postupku. Kolegij Doma je, u skladu s članom 101. stav (2) Poslovnika, odredio Komisiju za vanjsku trgovinu i carine kao nadležnu za razmatranje Prijedloga zakona.

Renata Bjelica pojasnila je da se ovim zakonom uređuje nadzor sigurnosti proizvoda stavljenih na tržište BiH. Uspostavlja se sistem nadzora nad tržištem i uređuju pitanja u vezi s tim, s ciljem osiguranja visokog nivoa zaštite zdravlja i sigurnosti ljudi, životinja, biljaka, imovine i okoliša. Također je rekla da su preuzete iste direktive kao i u slučaju Zakona o općoj sigurnosti proizvoda.

Nakon rasprave o predloženom tekstu Zakona i dobivanja odgovora od predlagača na postavljena pitanja, Komisija je jednoglasno podržala principe predloženog zakona.

U skladu s članom 104. Poslovnika Predstavničkog doma, Komisija će dostaviti Mišljenje predsjedavajućem Predstavničkog doma.

A.d.4. Analiza politika u oblasti poljoprivrede, ishrane i ruralnog razvoja BiH, s prijedlogom mjera (realiziranje zaključka 32. sjednice Komisije)

Predsjedavajući Komisije pojasnio je da je po zaključku Komisije Ministarstvo za vanjsku trgovinu i ekonomske odnose BiH pripremilo Analizu politika u oblasti poljoprivrede, ishrane i ruralnog razvoja BiH, s prijedlogom mjera, te je dostavilo Komisiji na razmatranje. Zatim je dao riječ Dušanu Neškoviću, pomoćniku ministra vanjske trgovine i ekonomskih odnosa BiH.

Dušan Nešković rekao je da godišnji izvještaj iz oblasti poljoprivrede za Bosnu i Hercegovinu za 2008. godinu, na koji se oslanja ova analiza, nije zadovoljavajući. S jedne strane, imamo povoljne ljudske, prirodne i druge resurse a s druge strane, faktičko stanje koje nije dobro. Na osnovu ustavnog uređenja BiH, svi postojeći nivoi vlasti, počevši od državnog pa do općinskog, imaju ovlaštenja u upravljanju sektorom poljoprivrede, pri čemu je uloga državnog nivoa jako mala. Republika Srpska ima uspostavljen registar poljoprivrednih gazdinstava dok Federacija BiH to nema, pa sistem podsticaja nije vezan za registraciju poljoprivrednih gazdinstava. Naglasio je da je neophodno usaglasiti entitetske s propisima na državnom nivou, što za sada sporo ide.

U raspravi su učestvovali svi članovi Komisije. Konstatirali su da je Analiza dobro i detaljno napravljena. Nakon rasprave, Komisija je jednoglasno usvojila sljedeći

ZAKLJUČAK

Komisija za vanjsku trgovinu i carine Predstavničkog doma je, na 36. sjednici, održanoj 7. 10. 2009., razmatrala Analizu s prijedlogom mjera. Nakon rasprave, Komisija je prihvatila Analizu s prijedlogom mjera i jednoglasno z a k l j u č i l a da zaduži Vijeće ministara BiH da razmotri Analizu i dodatno precizira nosioce realizacije pojedinih mjera s precizno utvrđenim rokovima do kada te mjere treba da budu provedene.

O realizaciji zaključka Predstavničkog doma i Komisije za vanjsku trgovinu i carine potrebno je obavijestiti Komisiju u roku od 60 dana.

Sjednica je završena u 13 sati

Sekretar Komisije
Emira Češljarić

Predsjedavajući Komisije
Slavko Jovičić